

Di acuerdo cu Minister Mike de Meza

Negociacion cu CITGO ta sigui normalmente

FOR di siman pasa, tin un delegacion tecnico di CITGO na Aruba, kendenan ta bishitado e refineria, mientras cu Gobierno tin constant contacto cu e ehecutivonan di e compania.

E siman aki, e delegacion cu ta negocia e parti final, esta e Definitive Participacion Agreement lo ta na Aruba pa sigui cu e negociacionnan cu Aruba.

Den e proximo 3 lunanan, e partidonan tin pa finalisa cu e nego-

ciacionnan, esta pa no mas tarda cu dia 31 di maart.

Tin varios punto pendiente, e.o. e traspaso di erfpacht cu tin cu tuma lugar; tin cambio di ley cu tin cu tuma lugar, cu mester bay Parlamento. Banda di esaki, tin pendiente pa discuti cu Parlamento proposicionnan cu tin riba mesa. Mester crea un compania Arubano di Refineria, cu lo bira doño di e refineria; e assests di Valero pa cual mester finalisa combersacion cu Valero p'e traspaso tambe tuma lugar.

Cu esaki e.o. Minister Mike de Meza kier ilustra cu tin varios punto cu mester ser atendi, prome cu por papia di un finalisacion.

E ta un proceso complejo y lo tuma su tempo y hasta intensivo. Nan tin 3 luna pa keda cla cu tur esakinan. Hecho ta cu e

proceso ta canando bon.

MILTON BERLINSKI

Milton Berlinski no ta forma parti di e delegacion negociador. Si e tabata parti di un Comision, cu tabata discuti diferente scenari-onan, pero unabes cu a firma un MOU, trabao di e comision ey a finalisa.

Gobierno a crea dicho comision pa hunto brainstorm riba kico t'e trayectorianan pa cana, kico tabata e companianan potencial y mes-cos e paisnan cu tabatin interes den e refineria di Aruba.

E comision ey tabata haci e contactonan cu e interesadonan.

Pa loke ta negociacion cu CITGO, segun Minister Mike de Meza, e delegacion di Aruba tabata bezig cu nan for di 2009 y na 2013 el a bira mas intensive, te cu 2015, y asina a cuminsa cu un negociacion.

Gobierno a crea un comision, pa negocia, esey Minister Mike de Meza a encabesa. Den dicho comision nan tin abogado, exper-tonan tecnico, cual comision ta haciendo trabao.

CRITICA

Pa loke t'e critica di e.o. lider di MEP, Minister Mike de Meza ta laga esey pa Evelyn Wever-Croes su responsabilidad. E si no a biaha den ningun avion priva di ningun hende. E por bisa hopi cos, pero de Meza ta laga eseynan pa cada ken carga nan responsabilidad.

"Nos ta sigui cu nos ta negocia di acuerdo cu ley y regla. Pa loke ta su contacto cu Roberto Rincon, berdad Husticia Mericano ta haciendo un investigacion y ta bon pa laga dicho investigacion sigui su curso. Pero Gobierno di Aruba no tin arte ni parte, sigur nada di haci cu e acusacionnan haci, pa e.o. lider di MEP", segun Minister Mike de Meza.

Minister de Meza no a nenga di tabatin contacto cu Roberto Rincon, unda el a wordo introduci na dje como un comerciante potencial, cu tin hopi inversion haci rond mundo. No tabatin nada contra pa sinta cu Roberto Rincon.

Como cu e persona aki tin contactonan halto na Venezuela y na Houston, t'asina el a pone Gobierno den contacto cu CITGO. Y awe por mira, cu Aruba ta na mesa ta negociando cu CITGO pa un posibel re-apertura di e refineria.

